

## Anuncio Publico

Tumando na consideracion e inmenso impacto di COVID-19 riba e economia global y mas recientemente Aruba, y e medidanan sin precedente pa mas cu tur cos mitiga e riesgonan pa salud publico y e efectonan asocia riba nos economia, Banco Central di Aruba (BCA) ta haci e siguiente declaracion.

Na prome luga y mas importante, BCA semper a hiba un maneho monetario estricto pa mantene confiansa den e florin Arubiano. Pa cu esaki, pa proteha e tasa fiho di e florin na e dollar Americano, durante añanan a crea un reserva internacional di divisa amplio, cu por resisti un periodo di volumen abou di entradanan di placa estranhero, pa motibo di e ceramento di frontera pa turistanan cu ta bishita nos isla cu na e momento aki ta vigente.

Na di dos luga, durante añanan BCA a ehecuta un maneho prudencial stringente y ta afirma cu e sector bancario di Aruba ta solido, ya cu e tin capital y likides amplio pa resisti shocknan externo significante. Como tal e banconan comercial tin e capacidad pa continua cu e ehecucion di nan funcionan mas importante bou di condicionan actual di hopi stress.

Pa sigui fortifica confiansa den e florin Arubiano y pa preserva e solides y estabilidad di e sector bancario, entrante 17 di maart 2020, BCA a tuma diferente medida adicional riba tereno monetario, prudencial y di divisa pa proteha Aruba su reserva internacional, y pa amplia e likides di e banconan comercial y nan capacidad pa absorba perdida.

### Medidanan monetario

Un di e instrumentonan mas importante monetario di BCA ta e reserva obligatorio, cual ta usa pa saca of hinca likides den e sector bancario. A reduci e tasa di reserva obligatorio aki cu actualmente ta na vigor cu 1 punto di percentahe te na 11 por ciento, asina expande e likides di e banconan comercial cu por usa pa duna fianza y cumpli cu e demanda pa likides adicional di nan clientenan.

### Medidanan prudencial

Pa por amplia e capacidad di e banconan comercial pa absorba perdida y nan habilidad pa continua y aumenta nan fianza bou di condicionan actual di stress, BCA a tuma e siguiente accionan inmediatamente:

- Baha e minimo di e asina yama “Capital Adequacy Ratio” di 16 por ciento pa 14 por ciento.
- Baha e minimo di e asina yama “Prudential Liquidity Ratio” di 18 por ciento pa 15 por ciento.
- Subi e maximo di e asina yama “Loan-to-deposit ratio” di 80 por ciento pa 85 por ciento.

### Medidanan di divisa

Entrante 17 di maart, 2020, BCA no lo duna ningun vergunning nobo di divisa pa por ehecuta transaccionan cu tin salida di capital, incluso declaracionan pa haci pagonan di dividend na no residente. Consecuentemente, e “Notice Foreign Exchange Transaction 02/K.1 no ta vigente mas pa transaccionan



## CENTRALE BANK VAN ARUBA

cu tin salida di capital. E paro aki tambe ta inclui peticionan pa vergunning y declaracion pa haci transaccionan cu tin un salida di capital y dividend cu a entrega na BCA pero cu no a procesa ainda.

Tur otro vergunning cu BCA a duna anteriormente ta keda vigente, incluyendo esunan pa pagonan di interes riba fianza y amortisacion. Adicionalmente, lo por continua cu pagonan di tur otro transaccionnan coriente (lopend), manera menciona den articulo 9, paragraaf 2, di e Landsverordening deviezenverkeer, sin un vergunning special di divisa di BCA.

Si ta necesario, BCA ta para cla pa tuma medidanan adicional pa preserva e tasa fiho di e florin Arubiano cu e dollar Americano y mantene e solvencia y solides di e sector bancario bou di condicionan di hopi stress.

Jeanette R. Semeleer

President

17 di maart 2020